



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma : Tir Yimym

tiryimym@aolima

tir yimym

TAPAK 7

Uruguay nung Cavani international football asaya nungi anener

Philippine tir-i China nem tekümdangtsü metetdaksü



VOL. XXI ISSUE NO. 230 (ADOK 230) DIMAPUR AMUNGNÜ (SUNDAY) AAMI (JUNE) 02, 2024 ₹ 5.00

Putuonuo Hospital-i Free Cancer Clinic tenzükur Cabinet-i ENPO dang ULBs election nung shilem agitsü mepishir

Kohima, June 1, 2024 (TYO): Putuonuo Hospital Kohima-i nübortem yaritsü aser cancer jelia putettsü atema Free Cancer Clinic tenzükogo.

Rev. Moa Longchari Cancer Foundation (RMLCF) aser Dr. K&T Keditsu Foundation teloktemi yaria Honibarnü iba Clinic tenzük.

National Cancer Survivors Day amongdang RMLCF founder Khrienuo Rio Moa aser Keditsu Foundation co-founder Dr. Toshevi Sema Keditsu nati iba sentong nung aden.

Putuonuo Hospital, Daklane Kohima nung Brihostibar shia nikongdang 2-4 ako tashi clinic lapoktsü ta Dr. Keduovinuo Keditsu-i ashi.

"Iba clinic lapokba nukjidong ya cancer awareness adokdaksütsü, temang anema ayutsü atema teyari bushitsü ajungmesotsü aser cancer stage jelia mesüra precancerous stage nung putettsü atema lir" ta lai ashi.

Iba free cancer clinic nung oncologists ajanga khen atema consultation & physical

examination aser mouth (oral), breast cancer o cervical cancer atema free cancer screening dena lir ta laisa ashi.

Iba clinic ya tesüba nung cancer atema anepalurtem mesüra cancer puteta alirtemi mesüra symptom free nisungtem mesüra consult & screen sünürtem atema dang masü ta Dr. Keduovinuo-isa metetdaksü.

Test ajak specialists, oncology nurses aser technicians ajanga asütsü aser 8794820089/8787312687 ajanga WhatsApp ser jelia appointments asütsü akok ta laisa ashi.

Tanü National Cancer Survivors Day sentong nung cancer nung jemburtem Kekhrieletso Kelio-i "Sickness & Healing - the vex nature", Samuel Venuh-i "Why me Lord" aser Khrienuo Rio Moa-i "Reflections from a caregiver" onüktem jembia liasü.

Sentong nung mendenji Dr. Dzuesebinuo Khezhe liasü aser Shalom Bible Seminary, Zubza Chaplain Inotoli Hesso-i temoatsü meshia sarasadem.

Kohima, June 1, 2024 (TYO): Nagaland sorkari Eastern Nagaland Peoples' Organisation (ENPO) dang June 26 Urban Local (ULB) elections nung shilem magitsü lemtetba meyipa reprangshitsü mepishiogo.

"Honibarnü state cabinet senden ka amenba sülen parnoki iba temepishiba sangoktsüogo. Iba senden nung ULB elections atema osang metetpela aser Eastern Nagaland Peoples' Organisation (ENPO) onüktem benoka lemsatep" ta government spokesperson & minister K G Kenye-i ashi.

"ENPO-i ULB election nung

shilem magitsü lemtetba atema nübortemi obang meputepba Cabinet-i osang angazükogo. Cabinet-i ENPO dang parnok lemtet meyipa reprangshitsü mepishiogo saka parnoki ano magizük lir. Ajisüaka küm aika lir ang elections agitsü alinung Eastern area nung bangdakpurtemi tangatetba tajung nung pei senso ajangzüksü asoshi lemtet agitsü imlar" ta Kenye-i ashi.

"Onoki nisung ajak dang ULB elections nung shilem agitsü mepishir" ta pai shisem.

Tanü cabinet senden nung tongtipang onük ka benoka

lemsatepbaji Chathe Valley nung Global Village - Naga Ki liasü.

Iba mapatong atema sorkari World Bank dang nungi senotsü teyari meshir. Linük nung mapatong tenet nungi World Bank-i North East nung iba mesükba mapatong ana nung yariteptsü sangdongogo, ta Kenye-i metetdaksü.

"NE state temi kanga toktepaka onoki World Bank teyari angutsü atema kanga merangdar aser parnok nungi osang tajung angashiogo. Iba mapatong nung World Bank-i yaritsü ta sorkar teimla lir" ta paisa ashi.

NDPP-i Jun 6 tashi ULB ticket meshitsü atsülanger

Kohima, June 1, 2024 (TYO): Lok Sabha elections indang results adokba sülen ang Nationalist Democratic Progressive Party (NDPP)-i ULBs election atema party candidates lemtettsü.

Tanü NDPP lennirtem senden ka amending party tickets agütsütsü candidates aser ULB

elections maparen atema onüktem lemsatep ta Minister K G Kenye-i ashi.

June 4 nü Lok Sabha elections indang results adokba sülen ang onoki party candidates atema telemetba agitsü. Iba jagi June 6 tashi candidate temi tenüng agütsütsü mapang atsülangerogo ta pai ashi.

Eastern Nagaland Peoples'

Organisation (ENPO) nungi party ticket meshia application karbo angu asü mangu ta osangbeneri asüngdangdang "Eastern Nagaland nungi party lennir aikati election nung shilem aginüba shiogo" ta Kenye-i langzü.

ENPO-i temepishiba balala angashia lemtet tajung ka agitsü imlar ta paisa shisem.

Noklak nung arasenba atema nisung 1 tepset

Dimapur, June 1, 2024 (TYO): May 28 nü Noklak district nung nisung ka arasenba atema tai tonglokja tepset,

Nisung ana dak tai tonglokja teka sangshidang ka asü aser ka kanga mejungi yiru. Nisung tepsetba ken o dak sendakba nung nisung pungu- Bumo Khiam (48), Shing (20), Khomong (42), Bilal Ahmed (27) aser Longol (25) nung puogo.

Rashal ta ser kisüdak mapa inyaker kati Head Mason (Thikadhar) Magmul Laskar aser kulem inyaker Hasnul Haque na den raratep. May 27 nü Rashal-i shishilembar Bumo Khiam dang tenati pa dak arasenba mapa

inyak ta ashi aser iba sülen Rashal Noklak toktsür par yimtsüngi ao ta Noklak Police-i ashi.

May 28 nü Bumo-i Magmul Laskar aser Hasnul Haque na alu jen kati balala jaoka asüngdangya asüadang tenaprongi arasenba mapa kecha meinyak aser tena dak Black Magic tashi kecha mali ta ashi.

Iba sülen Bumo den nisung pezüi Hasnul Haque tesem kati anir orr kanga mejungi züka merenshi aser pa Noklak District Hospital nung aniok saka May 29 aonung 9:00 ako meta pa asü.

Parnoki Magmul Laskar dak-a kanga mejungi azük aser pa kanga mejungi yirur anepaludar ta osang angazükur.

Tatalokba osang angashiba sülen police ketdangsurtemi temulung meleme bilemba ki kar mita ao aser ayaterm nungsa nisung 3 apu, saka tongti tai tongloktsüsang jena ao. Ajisüaka tasüngji pa den ano nisung ka police-i apu.

Tai tongoktsü alisangi pa ket nung country made 22 Pistol ka aliba nangzükogo aser ibaji injang den külemi police-i puogo.

Iba tatalokba atema maneni bushisüngdang südar aser June 3, 2024 nü parnok okadaki anir aotsü ta osang angazükur.

Asür Hasnul Haque-i pa kinungtsü aser tanur asem toktsür ogo aser par kinungertemi temeten meshir.

Nagaland SEC-i ENPO nem show-cause agütsür

Dimapur, June 1, 2024 (TYO): Nagaland State Election Commission (SEC) directed Eastern Nagaland People's Organisation (ENPO) president nem show cause ka agütsüogo.

ENPO-i Nagaland nung urban local body (ULB) elections nung shilem magitsü indang aiben yimjak nung sangdongba atema IPC nung Section 171 C nung per sub-section (1) nung lateta aliba ama kechiba temerenshi malitsü kuli agüjang ta SEC-i ENPO dang asüngdangogo.

State election commissioner TJ Longkumer-i ENPO president dangi shidi ka züluba nung ENPO-i aiben yimjak nung election nung shilem magitsü sangdong agüja arubaji ozüngi memelar ta shia lir.

Iba inyakyim ya nübortem

mesüra vote enoktsür ka election nung shilem agitsü temeten anema inyakba ama lir. Iba inyakyim ya State Election Commission (SEC), Nagaland nem municipality elections agitsü ketdangtsütsü, tetuyuba agütsütsü aser tashi agüja aliba anema lir ta SEC-i ashi.

IPC, 1860 nung Section 171 C nung sub-section (1) nung "shibai electoral right temeten nung kongshidir mesüra kongshitsü merangdir ibaji election nung tim mesüi meinprongba lir" ta lateta lir ta SEC-isa nenshia metetdaksüogo.

SEC-i May 17 nü ENPO president nem-a copy ka agüja sangdong ka agütsüba nung municipal and town council elections agitsü kanga tongtipang asüba metetdaksüogo. Election

nung shilem agitsü mesüra magitsübaji külemi masü saka kijai dang lemtettsüla ta SEC-i ashi.

Supreme Court-ia ULBs election atema Nagaland nung telok balala dangi sangdong yokogo aser telok kati election nung shilem magitsü lemtetba ya ozüng tsütsü timtem ajurutsü akok, ta SEC-isa metetdaksü.

Iba amaji süaka ENPO-i May 31 nü osangkakettem nung ULB elections nung shilem magitsü metetdaksüogo aser iba ya ozüngi memelar. Civil Appeal No. 3607 of 2016 nung IA No. 69269 of 2023 nung shia aliba ama Supreme Court-i ENPO president dena 'notice of contempt' agüja lir anungji Supreme Court-i election tiptema agitsü tuyuba sülen anidaksüla ta SEC-isa metetdaksüogo.

Anepdang osangkaket auyar



Dimapur, June 01(TYO) : Dimapur nung June 01 anepdang Tir Yimym osangkaket tesem kar nung auyaa orr aliba agi tazünger meyirijang dak tali osangkaket mezüngi süidaksüogo.

Dimapur nungi anogo shia adokba osangkakettem ya anepdang 3:00 ako nungbo tesem balala nung toktsüyonga aoer aser iba sülenang kibong shia oa alemertemi pei pei kiyongertem nung alemtsü asoshi bener aoer. Iba tsüngdaji aiben anepdang mesangwai yin, plastic aser kaket tejen aser tamajung shishia bendenertemi osangkakettemji dena auyaa bener aoba agi aiben osangkaket adoker aser tazüngertem akoksadaksür.

Iba kasaji June 01 anepdang Dimapur anasa Balijan nung alir tsümar chanu kati Tir Yimym osangkaket ya forest colony anasa tesem ka nungi auyaa bener aoba puteta police nem agütsüogo.

Osangkaket auyaba bushitepa aodang osangkaket ayoker kati PWD kiyong nung osettsüset aser kaket tejen ayokdak ka nung Tir Yimym talep kar ajungdaka lia ngutetba ajanga auerji putet. Ano osangkaketji talep karbo Balijan nungang süngo molua ayokdak ka nung alepshiradang amshitsü yokadoker liasü. Item tesemtem nung jagi osangkaketji nguteta bendenogo aser auersang den talizükertemji dena police-i puogo.

MLA Limaonen Chang-i Noksen yimtsüing semdang



Dimapur, Aami/June 1 (TYO): Noksen constituency nungi MLA, Lima Onen Chang-i, May 24 nü yirpu aitba ajanga teraksatsüba bener arutsüba indang sensak asemstü asoshi June 1 nü SDO (C) Office Noksen, Tuensang nung senden ka ayongzüka mena liasü.

Senden nung o jembiba mapang Lima Onen Chang-i, teyari takaratiba nung agütsütsü atema Nagaland State Disaster Management Authority den sensaksem dar ta ashi. Paisa, administration

dang District Administration mesüra SDMA-i teyari kechi agütsütsü ali iba indang asadangsü mepeshia liasü.

Kasa mapang nung pai, Noksen jila, Noksen yimtsüing aser Litem yimtsüing nung yipru agi raksatsür aliba kitem asadanga, lendong agi kongshir alirtem nem senotsü teyari agüja liasü. Maneni pai, lendong agi kongshir alirtem nem takokba tashi teyari agütsütsü aser sorkari takaratiba nung jenjang agidaksütsü atema inyaksü ta tenangzüka agütsü.

SDO (C) Noksen, Saratho Katiry-i, ki 65 khenyongi raksago aser ki 41 terara raksar lir aser iba den ak ki, jendang aser azükitem aika raksago, ta metetdaksü.

PHC Building, Anganwadi centre, St Thomas Parish, NAP station buildings aser GPS Litem nungger ajak yipru agi raksatsüo, ta paisa metetdaksü.

Maneni pai, District Disaster Management Authority nem teyari agütsütsü atema MLA Onen-i jenjang tapet agiba atema pa danga kanga pelaba lemsatep.

Phek nung World No Tobacco Day amung

Dimapur, Aami/June 1 (TYO): Alima ajunga den jangyu medema Phek nunga May 31 nü Dr. Wetshele Mero Memorial Hall, District Hospital, Phek nung "World No Tobacco Day" mungogo. Iba sentong nung Deputy Commissioner John Tsulise Sangtam alakteta jaoker liasü.

Sentong nung o jembiba mapang DC-i, school aser college ketdangsürtem dang parnok indang institution tem nung Tobacco amshiba nokdangsü asoshi temzüng ozüing tesashi

yanglua ayutsü mepeshia liasü.

Sangtam-isa, tanurtem dang anema alitsü aser takim nung takok nguyonga aotsü atema moko achiba nungi pila alitsü ajungshia liasü.

Iba anogomung omen: "Protecting children from Tobacco industry interference" nung ajemdaker jembiba mapang District Nodal Officer for National Tobacco Control Program Dr. Pufukrolo Koza-i, smokeless aser smoke tobacco ajanga nisung ka health dak kongshiba aser nübürtem

rongsenketzüing nung takoksa ajuruba indang lemsatapa liasü.

Sentong ya Dr. Kihito, Dental Surgeon District Hospital, Phek lenisüba nung agi aser Dr. Thungchanbemo Ezung Medical Superintendent DH, Phek-i lokti pela agizükba o jembiba liasü.

Maneni sentong nung Bishop Abraham Memorial School, Phek nungi kaketshirtemi ken ka aten aser Tobacco Free Schools nungi kaketshirtem nem Nesülü, Social Worker, National Tobacco Control Program, Phek-i kuli kakettem agüja liasü.

Longleng nung World No Tobacco Day mungogo

Dimapur, Aami/June 1 (TYO): Alima ajunga den külemi District Tobacco Control Cell, Longleng-i ayongzüka May 31 nü Longleng District kübok Government High School, Namching nung World No Tobacco Day mungogo. Iba anogomung ya "Protecting Children from Tobacco Industry Interference" omen nung ajemdaker munga liasü.

Sentong nung District Nodal Officer NTCP, Longleng

Dr. Nichukholie Vupru-i, ajemdaker powerpoint presentation ka agütsü. Pai, lanurtem atsüa arutsü atema Tobacco Company temi advertising aser shishilembatsü atema tasa balala amshiba dak rangloker tangazükba agüja liasü.

Paisa, moko achiba ajanga temang nung timtem balala bener arutsüba indang kaketshirtem nem metetdakja liasü. Pai, kaketshirtem dang social Media sabang balala

ajanga e-cigarette amala electronic Tobacco products tem advertisement sayuba nungi jenboa alitsü ajungshia liasü.

Iba sentong ya GHS, Namching Headmaster B. Ponghok lenisüba nung agi aser kaketshirtemi ken tajung ka tena liasü.

Team ya District Nodal Officer, NTCP Dr. Nichukholie Vupru aser Dr. Chumei Nyam, Dental Surgeon, Longleng nati anir oa liasü.

Mon nung counting officials training tanabuba shilem agiogo



Dimapur, Aami/June 1 (TYO): Nagaland Parliamentary constituency ka atema vote kecha tetsükdaksü makai azüngtsü asoshi Counting Officials tem training tanabuba shilem June 1 nü Town Council Hall, Mon nung agiogo.

Additional Deputy

Commissioner Mon, K. Temjennaro Longkumer-i, Counting Officials tem shilem aser khuret indang metetdaksü. Lai ashiba agi, district nung nisung kati danga vota magüjaka maparen ajak inyakyim ama benoka inyaksü ta ashi.

Laisa, ketdangsertem dang

training nung tesayubatem tenok tenoka angatsü aser vote azüngba anogo mapa shitak nung vote azüngba tesem tonga arutsü mepeshia liasü. Maneni lai vote azüngba anogo counting officials tem 3rd level randomization indang nenshia metetdaksü.

Mkg nung counting official tem training June 3 nü agitsü

Dimapur, Aami/June 1 (TYO): Deputy commissioner & District Election Officer, Mokokchung Thsuvise Phoji-i sangdong ka ajanga, AROs, Counting Officials aser Staffs tem tatembangbuba training June 3 nü 1 ako nungi tenzüka

Town Hall, Mokokchung nung agitsü ta metetdaksüo.

Mokokchung kübok AROs, Counting Officials aser staff tem ajak iba senden nung tamakok maludaksüi arua shilem agitsü DC-isa metetdaksüo.

DC aser DDMA Wokha mendenbuba-i pelaba lemsatep

Dimapur, Aami/June 1 (TYO): DC aser Chairman DDMA, Wokha Ajit Kumar Ranjan, IAS-i, DDMA tenüing nung 12th Bn. NDRF Kohima dang kanga pelaba lemsatepogo.

Wokha District kübok Doyang Dam nung May 27 nü nungi 30 tashi tsüingsang majungba mapang tekümzüka maparen takok ngua inyakba atema 12th Bn. NDRF Kohima dang kanga pelaba lemsatapa

laisü.

NDRF, Kohima-i mapang shitak nung jenjang tapet agiba ajanga Doyang Dam nung tia maka arakseta asür ana tasü mang nguteta parnok kinungertem nem meyipa agütsütsüto.

Iba tesem nung alirtem nem nenoki teyari tulu agütsüba atema kanga pelar, ta DC-i ashiba den, tarutsü nunga team-i takok ngua inyakyonga aotsü imlaja ataba lemsatapa liasü.

Medziphema nung merekmeju sentong ayongzüka agi

Dimapur, Aami/June 1 (TYO): June 5 nü World Environment Day amungtsü lia, iba nüngdem nung June 1 nü Medziphema administration-i ayongzüka Chumoukedima district kübok Medziphema nung plastic jana bendena merekmetba sentong ka ayongzüka agiogo.

2024 World Environment Day omen "Land Restoration, Desertification and Drought Resilience" dak ajemdaker administration-i, plastic ajanga alima menentsüba tajemba küm daksütsü, aser lokti nung recycling inyakyim ajungketsü nükjiding nung plastic jana bendenba sentong ya ayongzüka agi.

Administration-i ayongzüka merekmeju sentong nung state aser central, institution tem,

kibongtem, commercial establishment aser Medziphema town trade union nungeri shilem agia liasü.

Ki, office, shishilembadak aser temeket nungi plastic oset ajak bendena liasü. Plastic osettem ya category balala küma lemsa liasü. Plastic janatem ajak tesem ka nung bendenba sülen waste management team-i plastic janatem plastic waste management unit Medziphema Block nung toxic waste site ka nung bendena liasü. Plastic waste management unit Medziphema Block ya PHED department-i SBM (G) 2022-2023 kübok yanglua liasü.

Nübürtem aser sorkar institution temi shilem tajung agiba ajanga iba sentong takok ngua agiogo.

Phek nung Decoupage workshop agiogo

Dimapur, Aami/June 1 (TYO): Decoupage Workshop koba tetsür aser aiür chanutem atema skill development training program ka lir, iba sentong ya May 31 nü Town Council Hall, Phek nung ayongzüka agiogo.

Iba sentong ya District Administration aser Beti Bachao Beti Padhao (BBBP) kübok District Hub for Empowerment of Women, Mission Shakti, Phek District nati longjemer ayongzüka liasü.

Sentong nung alakteta jaoker ama o jembiba mapang DC Phek, John Tsulise Sangtam-i, workshop nükjiding dak pai tamang akaba lemsatepba den training nung shilem agirtem dang training nung tesayuba balala tenoktenoka anga nendanka angazüksü ajungshiba den shisalen sayurtemi skill balala sayubatem angazüka benshiyonga aotsü ayongzüka

liasü.

DC-isa, training nung shilem agirtem dang tarutsü nung rongsenketzüing dak sendakba nung parnok tangar dak metaloker malitsü atema nükjiding ayutsü ajungshi.

Kasa mapang nung Shisalen sayur Diethoseno Whiso-i, Decoupage indang aser iba ya koda amshir iba indang lemsatep. Laisa, training nung shilem agirtem dang mapa inyaksü atema yimya süpatsü ajungshi.

Training nung monü agia molok ataksü, sung agi spon yanglutsü aser tea coasters yanglutsü sayua liasü.

Workshop sentong ya District Mission Coordinator, District Hub Empowerment for Women (DHEW) Vilenuo Kapu lenisüba nung agi aser ajak senteper tetsür 35-i iba workshop nung shilem agia liasü.



June 01, 2024 nū Jantar Mantar, New Delhi nung Palestine Solidarity Committee-i ayongzükba sentong ka nung Palestine nunger pusema longkak aitdang tangokba noksa nung angur.

NDA-i Lok Sabha menden 370 nung takok angutsü: Exit Poll

New Delhi, Aami/June 01 (Agencies): Congress-i aniba Opposition-i taoba election dang nungi tawa agiba election nung menden teimba angutsü, ajisüaka BJP-i aniba NDA teloktepi menden 370 shi ngua sorkar akümtsü, ta exit poll ajanga asadangteto.

Election atema nüboyimba mapang nung BJP-i, NDA teloktepi menden 400 dak tema angutsü, ta jembia aruogo, ajisüaka NDA-i menden 400 jibo matongtsü, ta mongintemi asadanteter.

Taküm April 18 nungi tenzüka Lok Sabha election shilem tenet lemsar agiba June 1 nū election tembangogo, aser June 4 nū vote zünga election osang sangdongtsü.

Tawa agiba election nung BJP-i menden 400 dak tema nung takok angutsü nükjidadong yur toktepa liasü. Ano külen Congress-i aniba INDIA

teloktepi exit poll osangji tai ta ashir.

Lok Sabha elections tembangba sülen Ato kilonser Narendra Modi-i vote agütsüba nung shilem agir ajak dang pelaba lemsatopogo.

Exit poll osang dak sendakba nung Modi-i, "Maongka bushiba INDIA teloktepi voters atsüer marutet. Parnok ya telemsa adokdaksürtem aser ochimashirtem," ta ashi.

"Iba teloktepi kibong kar kümzüksü nükjidadong nung toktep aser linük atema parnok dak mangdang maliasü. Election nüboyimba mapang piyong parnoki Modi dang aija aruogo. Iba ama politics ji nüburtemi sendok," ta Ato kilonser Modi-i metetdaksü.

Honibarnü opposition INDIA teloktep nung lenirtem aika adenshia asalentong yanglu. Parnokisa opposition-i menden 295 dak tema nung

takok ngua sorkar akümtsü, ta asadantet.

Delhi nung ghonda ana dak tali senden amenba sülen osangbenertem den jembidang Congress Tir, Mallikarjun Kharge-i, nüburtem den asüngdangyaba sülen INDIA teloktepi menden 295 nung takok angutsü ta onoki asadantetogo, ta metetdaksü.

Exit polls dak sendakba nung Kharge-i, sorkar indang media medemertemi züngya tali asadanteta sangdonger, ta aitsü.

Kharge-isa, "INDIA teloktepi menden 295 dak tema nung takok angutsü. Onoki ozü lenirtem den jembiba sülen iba ya asadantet. Iba ya nüburtem survey lir. Nüburtemi ozü lenirtem nem iba osang ya metetdakja liasü. Sorkar indang survey lir aser media nung par medemertemia züngya tali asadanteta sangdongogo," ta metetdaksü.

Nagpur nung 56 ° Celsius atu, ta asüba osangji shidak masü: IMD

New Delhi, Aami/June 01 (Agencies): Maharashtra nung Nagpur nung automatic weather stations (AWS) ana ajanga Brihostibarnü temperature 54 aser 56 degrees Celsius atu, ta metetdakja liasü, ajisüaka Indian Meteorological Department (IMD)-i, sensors ajanga mapa shidak meinyakba ajanga tai asadanteta liasü, ta jangjashitsüogo.

Honibarnü Regional Meteorological Centre (RMC) Nagpur-i sangdong ka ajanga, "May 30, 2024 nū maximum temperature 56 degrees Celsius atu, ta asüba shidak masü aser official süa sangdongba masü. AWS ji CICR, Nagpur nung lir aser May 30 nū maximum temperature ji 44 degrees Celsius dang liasü," ta metetdaksü.

Aluyimba li hectare 24 nung

amenoka aliba Nagpur AWS ajanga Brihostibarnü 56 degrees asadanteta liasü. Ano Sonogaon nung aliba Regional Meteorological Centre (RMC) indang AWS-ia 54 degrees asadanteta liasü.

Iba jakdang Delhi nung aliba weather station katia maximum temperature 52.9 degrees Celsius asadanteta liasü, ajisüaka tesülen IMD ketdangsertemi, temperature teimtiba atuba asadantetbaji sensor nung timtem aliba agi liasü, ta metetdaksü.

Taküm India tesem aika nung, talisa North India nung kanga tatsük kümogo. Tesüiba ghonda 24 tsünga Odisha kübok Sundargarh nungbo tali atsükba agi nisung 12 süogo. Linük nung tongti reservoir 150 nungbo tzü shilem 23 ajema kümogo.



June 01, 2024 nū New Delhi nung Rajya Sabha MP, Swati Maliwal-i osangbenertem den jembidang tangokba noksa nung angur.

Odisha sorkari nüburtem dang anüngdang kimai mayazüksü mepishir

New Delhi, June 01 (Agencies): Hokolbarnü Odisha kübok tesem 13 nung temperature 42 degrees Celsius dak tema atuba sülen state sorkari nüburtem dang, taruba anogo asemnü tashi anüngdang 11:00 ako nungi tenzüka nikongdang 3:00 ako tashi kimai mayazüksü mepishia metetdaksü.

IMD indang Bhubaneswar centre, Titlagarh jila nung temperature 46.5 degrees Celsius tashi atu, aser state nung ibaji teimtiba liasü. Bolangir nung 46.4 degree celsius, Sonapur nung 46.2 aser Bargarh nung 46 degree celsius atu.

Odisha nung anüolen tsütsü Jharsuguda, Bhawanipatna aser Nuapada jilatem nunga temperatures 45 degrees Celsius

tashi atu. Bhubaneswar meteorological centre nung director, Manorama Mohanty-i, taruba anogo asemnü tashi state tesem aika nung kanga tatsük asütsü aser aonung kanga talem asütsü, ta metetdaksü.

IMD centre-i Honibarnü Bolangir, Sambalpur, Kalahandi, Sonapur, Nuapada, Bargarh, Jharsuguda, Boudh aser Kandhamal district tem nung kanga tatsük asütsü, ta metetdakja liasü.

Special Relief Commissioner (SRC), Satyabrata Sahu-i nüburtem dang taruba anogo asemnü tashi anüngdang 11:00 ako nungi tenzüka nikongdang 3:00 ako tashi kimai ayazüka maotsü mepishia metetdaksü.

Paisa contractors aser tanga

agency tem danga anüngdang 11:00 ako nungi nikongdang 3:00 ako tsünga aayangertem moapu nung mapa meinyakdaksütsüla; tashi mangartem nem temerenshi tulu agütsütsü, ta metetdaksüogo.

SRC-i nüburtem dang, anüngdang kimai aotsüsa kümra sü tai agi tekolak meyibangtsü, korang asemtsü mesüra anüshi apongtsü metetdaksü.

Ano külen state health department-ia public healthcare facilities nung tekolakpurtem dang tali atsükba agi temang nung timtem adoka shirangertem tajungtiba nung anepalutsü aser iba tensa mita repringtsü tuyuogo.

Tesüiba ghonda 24 tsünga Odisha kübok Sundargarh nungbo tali atsükba agi nisung 12 süogo.

Jharkhand kübok Dumka nungbo yimdaklir 400-i vote magütsü

Dumka (Jharkhand), June 01 (Agencies): Lok Sabha election shilem tenetbuba aser tatembangbuba anogo, Honibarnü Jharkhand nung Dumka district kübok yimtsüng ka nungbo nisung 400 dak temai vote magütsü, ta ketdangsertemi metetdaksü.

Yimdak mijang/koila indokba tesem ka yangluba anema longkak aita yimdaklirtemi vote magütsü, ta election ketdangser kati metetdaksü.

Dumka Lok Sabha constituency kübok Bagdubhi yimdak polling booth number 94 nung yimdaklir 426-i longkak aita vote magütsü.

"Iba polling booth nung voters ajak senteper 430 lir, ajisüaka nikongdang 3:00 ako tashi nung nisung pezüi dang vote agütsü," ta Dumka Circle Officer, Amar Kumar-i metetdaksü.

Railways indang koila

indokba tesem ka yangluba anema yimdaklirtemi longkak aiter.

Sub-divisional Officer, Ajay Kumar-i yimdaklirtem denji senden ka mena parnok dang, nenok tebilemtsü onük ya temaba ketdangsertem matsüngdang benoka jembitsü, ta nangzüka vote agüjang ta mepishia liasü, ajisüaka yimdaklirtemi vote agütsütsü memelung.

Osangbener den jembidang yimdak yimsüsür, Lakshman Soren-i, "SDO-i tezüluba nung onok dang koila indokba tesem meyanglutsü, ta nangzüka nung ang onoki vote agütsütsü, ta onoki jangja-jangja metetdakja liasü. Ajisüaka onok dang yamaji menanzüktet," ta metetdaksü.

Jharkhand kübok Lok Sabha constituency asem nung nikipongdang 3:00 ako tashi nung voters shilem 60.14-i dang vote agüja liasü.



June 01, 2024 nū Chennai nung aliba Tambaram Air Force Station nung 'Combined Passing Out Parade' nung Agniveer Vayu training agirtemi shilem agidang tangokba noksa nung anugr. Tetsür 234 densema nisung 1983 Agniveer Vayu training renemogo.



TIR YIMYIM

YIMOBILEM (EDITORIAL)

DIMAPUR AMUNGNÜ, JUNE (AAMI) 02, 2024

Teshisadang liang

Asenok dak aliba tekolok aser temulungjang nung ya tashi tuluka lir. Iba tekolok aser temulungjang amshia asenoki tajung o tamajung na bendangtettsü. Aji oda, asen dak aliba kolok aser temulungjang ajunga agi Tsüngremi mulungba mapa inyaksüsa renemtsübjaji asenok nisungtem atema kanga tongtibang lir. Asenok mulung nung Laishiba tekong aika rizünga yur anogo shia iba jagi asen taküm len anidaksütsü akok. Aji oda, asen kolok agi Tsüngremi yanglubatem kechisarina indang shisadanga Pa tashi aser taochi angatettsü merangba mapatemji asenok atema jangratemtsü mapatem lir. Atangji, asen taküm aser kibong raksatsü aser yanglutsübjaji aseni asen kolok aser asen mulungjang nung renemba dak keta lir. Asenoki asen kolok aser temulungjangji tamajung mapa inyaksü indang bilema renemra asenoki mapa tamajung inyaksü, anungji asenokji nisung tamajung asütsü. Aji oda, asenok ya akhidang Tsüngrem memetetba mapang jabujaria aliba taküm aser kibong ama mesüi, Tsüngrem den tashi angaa jajaba takümtem asütsü asoshi " asenok temulungjang aser tekolok jungjunga renemshir, shisadanga Yisu Khrista dak dang teimla yur akangkanga amanga liang," ta 1 Peter 1 : 13 nung shia lir. Iba Laishiba tekong nung asenok dang temulung nangri akangtsü ashiba tetetzüji asenok temulungjang renemtsüba indang ashir, aser maparen ajak nung teshisadang alitsü ajungshir. Asen nem tekolok aser temulungjang agütsübjaji bilemdanger tajungba jembitsü aser inyaksü asoshi agütsüba lir. Ajisüaka, asenoki aiben asen taküm aser kibong nung Tsüngrem taochi indang mebilemdangi mashi mashi jembir aser inyaker. Idangji, asenoki Tsüngrem dang masü saka asen adianu aser medemertem jashidaksür. Aji oda, asenoki aiben tanur ama meshisadangi inyakba ajanga asenok taküm nükjidonga matonger. Ibayongji, tenyar Pauli tamangertem dang joko tanur asüba mapang bilemba aser inyakba amato masü, saka tain amato shisadangtsü aser inyaksü 1 Korint 13:11 nung ajungshir. Aji oda, tenyar Pauli tamangertem dang , temulung nung tanur tesü saka tebilemdangba nung tain süang ta Korint 14:20 nung ajungshiba angur. Tenyar Paul mapang tamangertemi tanur ama dang bilem aser inyak. Ibayongji, aiben parnok rongnung mangatettep adok. Tanuri pei bilemba dang shitak amato bilemer. Tanuri tarutsü indang mebilemer. Tanuri tamalen inyakba mapatem amadoker. Tanuri peisasa yirutsüsa inyaker aser tangar a yirutsür. Tanur shisatsü nung taaktsü maket aser parnok kolok nung khuretsa bilemba shisatsü mali. Item tanur shisatsütemji kodang taintem dak lidir, iba jagi meputep adokdaksür aser tanüla mapatem dena takok ngua meinyaktetter. Tanü asenoka tain ser nung tanur ama bilemba purtem jenti lir. Ibayongji, yimten, arogo aser lokti tipdema anir moutetter. Tain ser nung asenok kolok aser temulung nung kibong, yimten, arogo aser lokti atema tebilemstsü kaa shisadanga mali. Asenok tebilemstsü aser khuret tangar nem bendaksür. Tanüla tsütsüa asenoki tanur ama tangar dak dang imlar. Asen taküm aser kibong asoshi tangar nem dang shisadangdaksür, tangar nem dang sarasademdaksür aser tangar dang dang asenok tia asüngdang. Tsüngrem o bushiba nunga asenok asoshi tangar nem Laishiba bushidaksür. Adianutem, itemji tanur yimya memesük no ? Iba ama tanur ama bilemba aser inyakba nungi asenok tain maküm tashi asenoki Tsüngrem sentsüwangshidaksütsüsa kecha meinyaktettsü. Alima nung tapu tapu ataloktsü aser tapu tapu jembitsü, idangji asenoki tanur ama bilemra asenok aoksatsü aser akoksatsü. Iba ama tensa nung asenoki asenoksasa nokdaktettsüsa, Laishibai ashir, temulung nung tangatetba akanga liang aser teshisadang liang .

OLEMSABANG

Ao Naga Mission Otsü 1872-1897

(History of Ao Naga Mission 1872-1897)

~ Rev. Dr. S.Wati 30/5/2024

Okila:- Ao Naga Mission Otsü tetenzük nungi Impur Mission Stationi atuba tashi tamangertemi otsü meteta alitsü asoshi iba ocet ya zülur. Asenok tamanger aikati otsü angashiba ajanga yamaji sür alitsü (assumption theory) mesüra ya, aji süra ajungtsü/ majungtsü ta shisadanga (logical analysis nung masü saka par tensa mapang atalokba kuli tezüluba (written evidences) aser tezüluba balala nung ajemdaker ni bushitetba zülur saka ya teberi aser tatemang ta mashir. Iba otsü nung Ao Naga Mission, Ao Mission Station, Impur Mission Station aser Ao Baptist Arogo Mungdang (ABAM) ta melentepa zülua alibaji Ao Baptist Arogo Mungdang otsü nungja kesa lir ta angatetti. Ao Baptist Arogo Mungdang otsü (ABAM) aser lim arogo otsü ya balala ta angateta tena tsüngda akokba tashi lim arogo jurila otsü den memeyoktepi ABAM otsü jurila otsü zülutsü merangogo. Lim arogo aser ABAM tesendaktepi ABAMi Lim arogotem liromedema inyakdaksütsü asoshi achaayangtsü aser Lim arogoi ABAM sentong takok asoshi nungittsü. Yim tenüng kar amshia alibaji ishikadak alaka iba ya lim arogo indang züluba ta mangatettsüla. Asenok Baptist Arogo yimsüsüba menden ya nütsüng nüburi (Congregational) yimsüsüba tentet lir kong lim arogoji mungdang dang nungi tashi balaka. Anungji lim arogoi kechi kuli ajanga par arogo metendaksür ibaji la tashi (the autonomy of local church) ta tangatetba nung zülur. ABAM kubok lim arogo ishika dak alaka arogo otsü ABAMi shilem agiba aika mangur anungji ABAMi lim arogo otsü nung shilem shisakaa agi nung tajungba asütsü ta angateter. Iba tangatetba nung iba ocet ya zülugo, ya kü kija tangatetba, bushitetba, bilemba aser jungtisüng ta shidanga tang lir, anungji iba yagi shinga temulung meyirutsü, aibelen masütsü aser mashi mangatettsü mepishir. Iba dak alaka ano kuli (evidences) aika alitsü anungji itemji bendenloka tarutsü nung zülushitsü lenmang sadema lir. **(Ajaki melamela angatettsü asoshi references tongmelangtiba agi amshia zülugo)**

Mezüng Naga nunger dangi Osangtajung

Putu 19 buba tetenzüklen Serampore Mission ajanga North East India nung Khristan yimsü benür aru, saka Serampore Mission 1830's nung anenadok. Iba sülen Major Jenking British company leniri American Baptist Mission Burma dangi mission mapa Assam nung arua tenzüksü shiti zülü (F.S.Downs, *History of Christianity in India Vol.V.Part 5 North East India in the 19& 20 Century*, p.41). Yamaji American Baptist Mission Burma aser American Baptist Missionary Union USAi mulunga agizüker Mr & Mrs Nathan Brown aser Mr & Mrs T. Cutter mezüng missionary Sadiya Assam 23rd March 1836 nung tonga aru (A.K.Barpurjari, *The American Baptist Missionaries and the North East India 1836-1900 AD*, p.322). Iba sülen 17th July 1837 nung Rev. Miles Bronson kibong aser Mrs Jacob Thomas arusem. May 1838 küm mission station Jaipuri belena ao.

Jaipur anasatiba Naga tenem kinji Namsang Naga liasü aser Mr Nathan Browni parnok den metettepa aküm. 7th-29th January, 1839 küm pai Namsang yimtsüng semdanga parnok den metettepa aküm. 13th March, 1840 küm Rev. Miles Bronsoner kibong Namsangi atu saka iba mission mapa takok mongutet. 14th May 1840 Rev & Mrs Cyrus Baker, Ms Roda Bronson Jaipur tonga aru aser Ms. Roda Bronson Namsangi ao (P.T. Philip, *The Growth of Baptist Church in Nagaland*, p.50).

24th May 1841 küm Sibsagar nung mission station tasen ka tenzük aser iba mapang mezüng Naga nunger kar temulung meyipa Khristan aküm (L. Kijung Ao, *Nokinketter Mongchen* 1972, p.16). Naga nunger rong nung Hebu mezüngbuba temolung meyipa 12th September 1847 nung Nathan Browni baptitsü aser pa mezüngbuba Naga Khristan liasü. Tanabuba Khrista agizüksangji Longjanglepzük Merangkong yimtsüng nungi liasü aser pa 7th September 1851 nung Rev.S.W Whitingi Sibsagar nung baptitsü, saka tia maka kobi melie tenaprongla süadok. Tasembuba nung Kongyak nunger ana (2) AKlong aser Amla bapti saka tenata süadok. Iba sülen küm 20 shi Aor o missionary na tsüngta tongtepratep kecha mali asü.

30th March 1869 küm Dr. Edward Clark Sibsagar mission tonga aru. Pai Naga tenem nisung tangi osangtajung bener atutsü tejangraba tulu nung Assam lenten lima nungi penzüa liasü (Puthenpurkal Joseph, *Baptist Mission in Nagaland A study in Historical and eculmenical Prespective* 1984, p.62). Iba mapang Sibsagar yimtijji Naga nunger asoshi shishilembaba tesem tongtipang ka liasü. Anogo shia Aortemji nok nü benür shishilemba oli aruli ta senzüa liasü. Itangji Assam nungeri Dr. Clark dang item nisung ya tekolok aleper kin ta ashi. Ajsakasa Dr. Clarki item kin dang osangtajung ashitsü tejangraba tulu liasü.

Kenü anogo Molungkimong (Dekahaimung in Assamese) yimtsüng nungi nisung kar Sibsagar nung Dr. Clarker kidangi nabong ka ayoktsü asüngdangi aru saka tetsübo agi malitsü ta shir meyipa yok (Mary Mead Clark, *A Corner in India*, p.1). Iba mapang kodang parnoki Dr. Clarki zülü ajenba aser kaket menüngba angu parnok kanga süngmanga liasü.

Mapang tatsüka lir kenü anogo Molungkimong nunger telok ka Sibsagar nung mission school ajanga süi idangji parnoki Dr. Clarki tanurtem dang lesson sayuba angu aser angashi. Parnoki jembitepa ashi "Reprangangjo, item tanurtem jagi parnok ket nung aliba temesüng (kakot) aser tanak (longpak) den jembir." Parnok rongnung kati Dr. Clark dang yamai ashi, "Sahib, onok yimtsüng tenemi atung aser onok tanurtem danga iba ya sayuang, onoki iba tesayuba tasen angazükdaksütsü atema onok tanur yoktsü" (A. Bower, *Under the Head Hunters eyes*, p.129). Dr. Clarki Aorji tokolak aleper ta meteta ali nung yamai ashi, "Ni kü kolak kü temang nung yunür, nenok ki kolak nung masü" (L. Kijong Ao, *Nokinketter Mongchen*, p.22). Telok jagi pa dang langzü, "Onoki medemer kolak maleper aser nai dang ozü yimtsüngi atura onoki na kümzüka ayutsü." Ibaji Dr. Clark asoshi Ao limai atutsü tayongzüka tulu liasü. Tejangraba aser mangdang tulu den Dr. Clarki Aor aser Naga nunger osangtajung agi tongdaksütsü asoshi lenmang bushitsü tenzük (A. Bendangyapang Ao, *History of Christianity in Nagaland; A source Material*, p.52). Pai Godhula Rufus Brown shiba Assamese evangelist aser tesayur liasü, pa dang Sibsagar nung alirtem nungi Ao O angazüksü nungloktsü.

(Maneni tapak 5 nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pastor Raymond samaba atema ACLJ-i Malaysia dang tasüngdangba akar



Pastor Raymond Koh (tiyong) pa kinüngtsü Susanna (ajichilen nungi tanabuba) aser par chirnurtem noksa nung angur.

June 01, 2024: American Center for Law and Justice (ACLJ)-i X ajanga Malaysia sorkar dang Pastor Raymond Koh kong lir ? ta asentenshir tasüngdangba akar; parnoki tenzüka petition ka nung tang tashi nung nisung 29,115-i sign süogo, ta International Christian Concern (ICC)-i metetdaksü. "Malaysia nung Pastor Raymond Koh samaba sülen

küm tenet jungogo saka tang tashi Malaysia sorkari telanzüba agütsütsü memelunger. Tang UN nung ACLJ-i pa (pastor) chioktsü atema akhanger," ta ACLJ-i metetdaksü. 2023 küm ACLJ-i United Nations nung Malaysia sorkari yimsü temeden anema inyakba indang metetdakja liasü. 2017 küm February ita nung

United States Commission on International Religious Freedom (USCIRF)-i, "Raymond Koh-i yimsü dak sendakba mapa inyakba aser temeim mapa inyakba ajanga pa kangshia samadaksü," ta metetdakja liasü. Pastor Raymond linük yimtiba, Kuala Lumpur nung lia nisung kari puer aoba CCTV noksa ajanga bushiteta liasü.

Sangküm Gather25 sentong nung Khristan ajaki shilem agitetsü

June 01, 2024: Alima nung Arogo mission dak sendakba otsü tasen ka yanglua technology ajanga alima tesem balala nungi Khristantemi ajak longjemtsü. Sangküm March 1 nü alima tesem ajak nungi aser denomination ajak nungi Khristantem ajak longjemter ghonda 25 sarasademtsü, Tsüngrem külemtsü, tatok meshitsü aser Kibubai tenyaba wadang nungloktsütsü. "Gather25" ta ajaba sentongji YouVersion, The Bible Project, OM, 24-7 Prayer International, World Evangelical Alliance aser Alpha Course densema Khristan organization aikati senteper ayongzüksü. Parnoki regional partners aser ministry balala den longjemter inyaktüsü. Gather25 sentong nung continent ponguprongla nungi Khristantemi video conferencing ajanga shilem agitsü, iba sentong ya television nunga sayatsü aser live sayatsü. Ibaji ajanga alima tesem ajaklen

nungi Khristantemi pei kidang mener mesüra theatres nung aser pei Arogo Tenla kitem nung adenshia shilem agitetsü. Gather25 sentong nungji kentenertemi shilem agitsü, Laishiba tesayuba agütsütsü, sarasademtsü, oshi balala nung teimla aser taküm kuli lemsateptsü aser ibaji ajanga alima nung Khristantem sabang ka nung longjemtettsü. "Alima puti otsü nung tang mezüng Arogo ka küma longjemtettsü. Anungji onoki alima nung Yisu meimer nütsüng billion 2.5 iba sentong adentsü jaoka sarasadem nung shilem agitsü, Arogo otsü metettsü aser alima tatembanglen tashi missionary tem yoktsü atema ayongzüker," ta Gather25 apitetsang, Jennie Allen-i metetdaksü. Gather25 sentong nung ghonda 25 ji continent shiai lemsar ketdangsia agitsü. Iba sentong nungjisa Arogotem, ministries aser Khristan lenirtemi peipei aliba tesem nung

Tsüngremi mapa inyakba kuli asütsü. Parnok leniba nung tekülem sentong agitsü aser alima nung Khrista osangtajung lemsateptsü atema ajungmesotsü," ta Allen-i metetdaksü. Africa New Life Ministries tentetsang aser Rwanda nung aliba New Life Bible Church nung pastor, Dr Charles Mugisha-i, "Gather25 ya Tsüngrem nüburtemi Khrista tiyongtsü südaksür ka küma longjemtsü atema maongka lir. Ghonda 25 tashi asenoki alima tesem balala nung Tsüngrem tashi indang otsütem metettsü aser Yisu sülen anidaker kibong tulu longjemter külemtsü," ta metetdaksü. Pastor-isa, "Tsüngrem memetetba nütsüng billion aika lir. Gather25 sentong ajanga tenyaba wadang inyaktüsü Tanela Temeshi ajanga Arogo ajungmesotsü asoshi ni sarasademter. Ibaji ajanga alima nung ajaki Tsüngrem temeim meteta akümtsü," ta metetdaksü.

Tanü nungi tenzüka 'The Chosen' app nung Season 4 repringtettsü

June 01, 2024: 'The Chosen' yanglusang aser director Dallas Jenkins-i, The Chosen Season 4 streaming anogo sangdongogo. The Chosen ya Yisu Khrista taküm otsü indang series ka lir. Angel Studios den legal tsütsülen nungi mangatetep kar aliba ajanga Season 4 streaming menoa liasü, ajisüaka telok anapronglai Laishiba tesayuba nung ajemdaker iba mangatetep bentetsü atema bangjemogo, ta Dallas Jenkin-i metetdaksü. Season 4 ya taküm February

ita nung theatres nungbo sayaogo, saka 2022 küm contract dak sendakba nung Angel Studios den legal tsütsülen nungi mangatetep aliba ajanga streaming anogo menoa liasü, ta taoba Bodhbarnü Jenkins-i metetdaksü. June 2 nü Episode 1 ya The Chosen app aser series indang social media accounts nung sayatsü aser Episode 2 ji Brihostibarnü (June 6) sayatsü. Tanünga episodes ji taruba

ita piyong Amongnü aser Brihostibar anogotem nung sayatsü, aser episodes ajak methitemi repringtsü janrartemi DVD/Blu-ray nung season 4 alizüksü akok, ta Dallas Jenkins-i metetdaksüogo. "The Chosen ya maneni angati asütsü," ta paisa metetdaksü. Laishiba nung ajemdaker yangluba The Chosen series ya alima tesem ajaklen nisung million 200 dak temai repringtogo.

ANO GO ABEN TSÜNGREM DEN

KIBUBA TSÜBUBAJI TAKÜM TZÜPOKDAK

Kibuba tsüsubaji taküm tzüpokdak. Yamala jagi tasüba sang nungi pilatsü akok. Apijemtsü 14:27

Tsüngremji asen teyanglur aser Kibur. Teyangluba nisung kati teyanglusangji kodaka meteta alitsü tim. Yamaji kilir kati koda Kibur küpok tashi anga-a alitsü tim, aji meinyaktetra Kiburjia mepelar aser kilirjia jangratema aser sadoka alitsü makok. Alima yimya nung Kibur, tesayur, lenir akümtsübuwa alitsüji tim, kechiaser iba nung temoatsü aser anisüngzük tulu lir. Mapang i balala melentepba iba tensa tiaji ajurudang ajaki iba temoatsüji agitsü koda tongtipang ta angateter.

Meimchir ka taküm nung shisa kaa jangratema aliba aser shisa makai jangra medemi aliba ana tepila ya kanga tulu lir. Kibuba tsüsubaji taküm tzüpokdak tetezü tzü meteni meimchir taküm alitsü makok. Tanela nunga tzüpokdak ka lira aser aji asen Kibuba, Pa angateta Pai mulungba ama alitsü mulungtetertem asoshi tzüpokdak nungi tzü yima jangratema anisüngzükba ama taküm tia jenjang balala ajurudang Kibuba dak jenoka pai yaritsü. Asen taküma Khrista akaba ajanga tzüpokdak tajung ka ama tangar nem temoatsü agütsütetsüsa asüngteta sarasadema alitsü tim. Tsüngremi mulungba nung litetba ajanga tasüba paidoker, anungji iba temoatsüji agitsü merangdi.

Ao Naga Mission Otsü 1872-1897

(History of Ao Naga Mission 1872-1897)

(*Tapak 4 nungi...*)

1870's tetenzüklen Ao lima nung yaksü (small box) wara atokba ajanga tekümüzsütsü bushia nisung aika Assami alu. Iba mapang Süpongmeren Molungkimong nunger, shiba Aor sobaliba aser oshiben nung tetangshi liasü pa-a Sibsagari alu (N.Toshi Ao, *Mission to the Nagas: A Trust with Aos*, p.76). Mapang tatsüka tsüngda Godhula den metettepa tembar tajung aküm aser Dr. Clark den metettepdaksü. Süpongmeren December 1870 nungi October 1871 tashi Godhula aser kinungtsü Lucy den ali, iba mapang pai Godhula aser Dr. Clark dang Ao oshi, ken o, sobaliba aser limapur yimsu indang sayua aser shia liasü (P.T.Philip, *The Growth of Baptist Church in Nagaland*, p.15).

Godhula Ao Naga Tenemi Atuba

Mapang khenbika lir Dr. Clark aser Godhula mezüng Ao Naga tenem, Molungkimongi atua Ao Mission tenzüksü sentong yanglu (N.Toshi, *Godhula Taküm Otsü*, p.9). Saka Dr. Clark asoshi Ao Naga tenemi atutsü tenokdangtsü kar aliba ajanga Godhula aser Süpongmeren, Sibsagar Baptist Arogo nung sarasadem agir October 1871 nung atu (Mary Mead Clark, *A Corner in India*, p.10). Tamasabo Godhulaji company nisung itangiter (spy) ama bilem saka Süpongmereni yimdak lir nem angatetdaksür süngküm anasa semtu tilaka yanglur yangji tanüker yutsür pa mejangdaksü. Pai yangji aonung sangwa ken tena sarasadema liasü. Tasüngji yimdaki anioka arujo nung tanükertemi nüka lidaktsü aser iba mapang yimden yimsüsürtemi asüngdangya asü. Asemnü buba nung Godhulaji sorkar itangiter masü ta meteta nütsüng nüburtem den ajurutepa sensaksemtsü mela. Hapta ka shi Godhula alidang pai ken atenba, sayutsüngiba aser sarasadema ajanga nüburtemi pa kanga sakloka aküm aser kodang Assami meyipa alutsü mapang atong kanga menungra-a temeinerem 2 tashi agi meinoktsü (*Fifty-Seven Annual Report 1872 in American Baptist Missionary Conference*, (ABMC) p.39).. Iba sülen Godhulai 7 ben dak tali Naga tenem semdanga liasü (n.a, *Molungkimong Arogo Centennial Otsü*, 1972, pp. 3-4).

6th April 1872 Godhula aser kinungtsü Lucy Ao Naga tenem nung alitsü atema Molungkimongi atu. Iba mapang yimsüsürtemi semtu tila ka yanglua tena lidaktsü. Ita 7 tashi tenati mission mapa inyakbaji Ao-Naga asoshi süngjang atangba mapang ka liasü kechiasür iba mapang lanur 9 tashi temulung meyipa Godhula aser Lucy tenati Sibsagari anir lua Dr. Clarki 10th November 1872 nung Dikhu ayong nung baptitsü aser Sibsagar Baptist Arogo nung tenüng züluk. Yimdaki meyiba atur parnoki tekülem ki ka yanglu aser Godhula lenisüba nung tekülem agia liasü (*Fifty-ninth annual report 1873 in ABMC*, p.66). Iba ya Naga tenem nung talisa Ao lima nung mezüngbuba tekülem ki yanglua külembaji lir.

AO OSHI ANGAZÜKDAK:
TANÜ ANGAZÜKTSÜBA OJANG



Süpusüym

(adv) yimpazümalem, zübazübaa aliba (inattentive)

* Mapa nung süpusüyima aliri medemer memeneper.

Süreppepa

(adv) aritepa, yakyakta (hastily)

* Nisung ajak süreppepa chiyonger mapai ao.

OLONG PAITEP # 6805

1		2		3		4	5		
				6					7
		8							
9				10		11			
			12					13	
						14			
16						17			

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S ___ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangliba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

OLONG PAITEP # 6804 TELANGZÜBA

TIPIEN :

- 3. Alizüng, 5. Jahaz, 6. Obang,
- 8. Liku, 9. medemer, 14. Wain,
- 16. Yimra, 17. Arogo,
- 18. Osemlok

LANGTSÜNGLEN :

- 1. Ojang, 2. Shilem, 2. Azük,
- 4. Zübu, 7. Nao, 10. Renlok,
- 11. Tai, 12. Molok, 13. Arem,
- 15. Alak.

NAI-A YA METETTER MA

India nung er Vinod Kumar Chaudhary-i taoba nung pai yangluteta a liba



Guinness World Record ka ajatetogo. Vinod Kumar Chaudhary-i pa teni agi mapang tekaratiba nung alphabet type asüba indang otsü yanglutet. Arishi küm 44 tain Vinod 25.66 seconds nung dang pa teni agi English alphabet type sütetogo.

WATER BORING SOLUTION (DIMAPUR AREA)

We do complete Borewell job using A to Z branded materials.

(Around 300 Feet depth) with a reasonable budget of just Rs.2,00,000 (Two Lakhs only).

IF INTERESTED, KINDLY CONTACT US :
7005342378 or 9436644497

Assam nung tzümetzüng ajanga nisung 8 asü; aika timtemer



Guwahati, June 1, 2024

(Agencies): Cyclone Remal sülen Assam nung tzümetzüng ajanga nisung 8 taküm samaogo. Taoba ghonda 24 tsüngda tanur ana dena nisung 6 asü.

Assam nung tzümetzüng tensa kanga mejungi ajurua lir aser district 11 nung nisung lakh 3.50 lakh tema timtemer.

Tesüiba ghonda 24 tsüngda tzümetzüng nung tanur ana dena nisung 6 asü ta Assam State Disaster Management Authority (ASDMA)-i metetdaksü.

Cachar district nung tanur ka dena nisung 3, Hailakandi district nung tanur ka dena nisung 2 aser Karbi Anglong West district nung nisung ka tzümetzüng lendong balala nung asü ta ASDMA flood report ajanga ashi.

Cachar district nung nisung 1.20 lakh, Nagaon district nung nisung 78756, Hojai district nung nisung 77030, Karimganj district nung nisung 52684 aser Hailakandi district nung nisung 10165 timtemer.

Karbi Anglong, Dhemaji, Hojai, Cachar, Karimganj, Dibrugarh, Nagaon, Hailakandi, Golaghat, Karbi Anglong West aser Dima Hasao district temkübok yimtsüng 560 tashi tziü agi metsüngbanga lir. ta ASDMA-isa ashi.

Ketdangürtemi relief camps aser distribution centres 187 lapokogo aser nisung 68,600 tashi jenoka lir.

Tzümetzüng ajuruba tesemtem nung NDRF, SDRF, Police, Fire and Emergency Services (F&ES) aser local administration-i yaritepdar.

Prime Minister Narendra Modi-ia Prime Minister's National Relief Fund nungi tasür kibong shia nem Rs 2 lakh teyari agütsüsü metetdaksüogo. Iba ya Assam, Manipur, Meghalaya, Mizoram, Tripura aser West Bengal nung Cyclone Remal ajanga lendong balala ajuruba atema agütsüsü.

Prime Minister-isa Cyclone Remal sülen lendong balala nung yirur shia nem Rs 50,000 teyari agütsüsü metetdaksü.

Honibarnü Cyclone Remal sülen Assam nung rescue operations inyakdang nisung 966 aser shiruru 89 kümzüokogo.

Iba mapa ya Assam Fire and Emergency Services (FnES Assam) aser State Disaster Response Force (SDRF) ajanga inyaker.

Meghalaya anentsüh lendong nung tasü mang 4 ngutetogo

Shillong, June 1, 2024

(Agencies): Meghalaya kübok Nongpriang yimtsüng nung anentsüh agi anenbangba nisung 4 ngutetogo. Tasü mangtem rongnung tebu, tetsü, jabaso aser par kiyonger dena liasü.

Tzünglu kanga aruba ajanga Sohra kübok Nongpriang yimtsüng nung anentsüh alu aser idangji ki ana anenbanga nisung 4 asü.

Iba osang angashiba sülen Sohra sub-divisional officer-i emergency & rescue teams yok aser tesülen State Disaster Response Force (SDRF) o Special Rescue Team (SRT) teloktemi yaritep.

May 30 nikongdang anentsüh agi anenbangba Phisar Nongrum (75) mezüng angu. Pa sülen May 31 anepdang anentsüh nungi Lumlang Riahtam (16) mang angu aser nikongdang Riahtam tebu Kynmaw Syngai (70) aser tetsü Benti Riahtam (60) na mang angu.

Yashi nikongdang Meghalaya secretary in-charge of revenue & disaster management, Matsiewdor War Nongbri-i iba lendong nung tasü mang ajak ngutetba osang metetdaksü.

Meghalaya chief minister Conrad Sangma-i tuyuba ama East Khasi Hills Deputy

Commissioner Sibhi C. Sadhu-i tasür kibong shia nem Rs 4 lakh agütsüsü metetdaksüogo.

Meghalaya Revenue and Disaster Management Minister, Kyrmen Shylla-ia anir ketdangürtemi Nongpriang yimtsüng semdanga senotsü teyari agütsü.

Meghalaya nung Cyclone 'Remal' ajanga nisung 30,000 tema dak kongshiogo aser tamajungtiba kongshibaji Garo Hills liasü.

Cyclone 'Remal' ajanga yimtsüng 558 nung tzünglu kanga aru, mopung tesashi aon, tzümetzüng ajuru aser anentsüh alua liasü.

Manipur kübok Kangpokpi nung prangpong-injang aika angu

Imphal, June 1, 2024

(Agencies): Kangpokpi district kübok tesem ka nung state aser central forces-i prangpong-injang aika ngutetogo.

Osang tejangja ka angazükba sülen Assam Rifles aser Manipur police külem telok kati Kangpokpi district kübok Kheingjam yimtsüng nung mita ao. Iba yimtsüng nung Kuki-Zo nung teimba lir.

Parnoki ghonda 3 jungnüa mita aodang 7.62mm SLR, magazines, 12-inch SBBL Gun, 10 Live rounds of ammunition



as er Baofeng Radio Set angu. Ajisüaka iba dak sendakba nung nisung shinga pua marutet

as er bangdak police stations ket nung prangpong-injangtem agütsüogo.

Philippine tir-i China nem tekümdangtsü metetdaksü



Philippine tir Ferdinand Marcos Jr

Manila, Aami/June 1 (Agencies): Philippine tir Ferdinand Marcos Jr-i, China dang South China Sea nung red line ka majangtsü atema tekümdangtsü metetdaksüogo, kong linük ana tsüngda mangatettep tali kümer lir.

China inyakym ajanga Philippines nung ka danga süra Philippines-i iba ya "an act of war" ama agizüksü aser telangzüba tapet agütsütsü, ta pai Hokolbarnü ashi.

Singapore nung security forum ka nung o jembiba mapang Marcos-i iba tekümdangtsü metetdakja liasü. Iba senden nung US defence tekolakba Lloyd Austin densema linük balala nungi defence tekolaktemi shilem agia liasü.

Marcos-isa, iba tesem dak Washington-i tongtibangsa rangloker inyakdar, kechiyong Asia kümzüka ali nungdang US a kümzüka alitsü, ta ashi.

Ita ishika tsüngda China aser Philippines na South China Sea nung alinük kar atema mangatettep adoka aruba tamajungba kümogo.

Manila-i, China nung indang patrol rongtemi Philippine indang rong aser supply bener aoba rongtem dak water cannon khaloktsüba atema ashishia arudar.

Iba dak sendakba nung Beijing-i ashiba agi, parnok indang sovereignty kümzüka

ayutsü atema iba jenjang agir. Summit nung China military otongdari parnok rongshiba atema Philippines aija liasü.

Ken o asadanga alirtemi, tensa mejungi küma aoba ajanga South China Sea nung China aser America na mangatettep adoktsü ta tsübuja bilemer. Philippines den tenangzüktepba yanglur aliba ajanga Philippines makra US iba linük kümzüksü atema arutsüsa akümtsü.

US-i ashiba agi, iba tesem nung parnok den sendaktepa aliba linüktem den masetshi-i nokdaksü atema parnok bendanga agütsür lir. US-isa, item linüktem den tesendaktep yanglushitsü atema merangdar aser Philippines aser Japan nung taoba ita summit ayongzüka agiogo.

Hokolbar aonung Singapore nung Shangri-la Dialogue nung Marcos-i o jembizükba sülen delegate kati, China indang water cannon agi Philippines nung sepa ka tepsetra koma aütsü ta asüngdanga liasü. Paisa, iba inyakym ya red line ka adenba ama agitsü magitsü aser iba amala tensa ka nung US-Philippines treaty benoktsü mebenoktsü, ta asüngdang.

"Asa Filipino nung ka; sepa dang masü Philippines nung-danga tepsetra 'act of war' ama agizüksü anungji iba dak ajemdaker telangzüba tapet

agütsütsü. Onok indang treaty partners-ia kasaji agizüksü ta amanger," ta Marcos-i ashi.

Paisa, tawa mangatettep adokba mapang Philippines nung karbo yiruogo, saka ka danga tepseta mali, ta ashi.

Iba sülen ghonda ishika lir US Secretary of Defense Lloyd Austin-i o jembiba mapang ashiba agi, Philippines tang amokmerena aliba ya lendong tulu lir, ta ashi.

Marcos-i jembiba dak sendakba nung US-ia koma telangzüba agütsütsü ta asüngdanga mapang pai, Philippines den onok tesendaktep asetshitsü makok ta ashi, ajisüaka US-i koma telangzüba agütsütsü iba indangbo jembia matatsü, ta shisem.

Ajisüaka pai, parnok maneni sensaksem taliba benoka agitsü aser anüing aser tzüyim nung sadem sadema senzütsü atema inyaktsü, ta ashi. "Tensa mazüokteti meyoktsü onok nukjidong lir. China den rara mepaitoktetsü ta masü mesüra iba ya sentoka toktsütsü ta masü," ta pai ashi.


Asia nungi delegate tem sünga mena aliba takdang ka nung pai, Ukraine aser Gaza nung mangatettep adoker liaka Indo-Pacific tesem kümzüka ayutsü ya US atema tongtibangtiba lir, ta ashi.

Paisa, Asia linük balala defence akangshitsü atema military exercises, tenangzüktepba aser US nung sepaitem yoka jenjang agidar, ta ashi.


US indang tasa rongnung tongtibang kaji Philippines indang military akangshitsütsü asoshi lir. Iba sentong nung shilem ka ama US-i, drone, military transport aircraft aser defence system tem yokba angutsü akok. Maneni Indo-Pacific nung US den sendaktepa aliba linüktem atema US indang military teyari telong junga angutsü Manila-i imla atadar.

Kasa mapang nung Philippines-isa, military nung sen timba intokdar aser parnok India dang nungi missile alizükogo.

OFFICE OF THE
CHANGTONGYA KAKETSHIR TELONGJEM
Tenüngsang Agütsür



Changtongya Kaketshir Telongjem ajanga Wb. Takuyanger Jamir aser Wt. Temsujungla na jala **Dr. Temjennaro Jamir-i** NPSC, 2023 tatidang nung Assistant Professor in Mathematics jenjang nung takok tulu ngutetba asoshi tenüngsang agutsür.



Tsüngremi ne takum aser wadang nung maneni moajangma.

Sd/-
Sb. Arensashi
President, CKT

Sd/-
Kr. Sashilemla
General Secretary,CKT

MULUNGNEN O



Aso: 09.01.1994 **Asü: 13.05.2024**

Late Sentilong Jamir (Akhoya)

Onoki teti meima aliba asür **Sentilong Jamir** (Akhoya), iba lima nungi pila-a aoba anogo/mapang kija, kibong, kiyonger, kinunger, Arogo aser lokti balala shirnokisa nübo, rongsen, sarasadem aser mulungnen o agi ozü den yaritepogo, nenok ajak dang kanga pelaba kinungertemi metetdaksür.

Nenok ajak dangi tsüngtong arua pelaba meshitetba atema sasa-a bilemer. Nenok temeim mapa tajung asoshi asen Tulusang Tsüngremi ajak moajang ta ozü tamang sarasadem.

~ Temeim Kinungertem

Russia-i Ukraine indang energy facility tem amak

Kyiv, Aami/June 1 (Agencies): Russia-i missile aser drone aika yokba sülen Ukraine kübok tesem pongu nung energy infrastructure tem raksatsüogo, ta Ukraine nung ketdangsurtem metetdaksü.

Ukraine indang national grid operator Ukrenergo-i Honibarnü ashiba agi, missile aser drone tem yagi eastern Donetsk, southeastern Zaporizhia aser Dnipropetrovsk tesem aser iba den Kirovohrad aser Ivano-Frankivsk na nunga facility tem dak kongshiogo.

"Tanep Russia-i ano Ukraine indang energy facility tem maka liasü. March ita nungi tenzüker tang tashi nung missile aser drone amshia civilian energy infrastructure tem trokben makogo," ta Ukrenergo-i ashi.

Iba dak sendakba nung Russia-i kecha telangzüba agüja mali, shirnoki 2022 küm February ita nungi Ukraine maka arudar.

Ukraine indang air defence-i, Russia-i yokba missile 53 nungi 35 khazüka yok aser drone 47 nungi 46 khazüka yokogo, ta air force commander-i ashi,

March ita nungi tenzüka Russia-i asendenshir Ukraine indang power infrastructure tem maka arudar aser iba ajanga thermal aser hydropower generation dak kongshia tetsükdaksü aika ajangshidar.

Ukraine indang private energy-generating company tulutiba DTEK-i ashiba gi, parnok indang thermal power plants ana dak kongshiogo aser

hadirtem kanga mejungi raksatsüogo.

Regional ketdangsurtemi ashiba agi, tesem balala amakba sülen mibenertemi tesem aika nung mi remseptsüogo. Ajisüaka lendong nung nisung asüba osangbo kecha mali.


Ukraine nem Russia telung nung tesem balala amaktsü atema tenokdanga agütsür aliba kar agintsüba indang US-i sangdongba sülen anogo ka lir missile aser drone amshia Ukraine kübok tesem balala makogo. Kharkiv tesem kümzüka ayutsü atema iba temelaba agüja liasü.

France aser Europe nung aliba linük balalai, Russia telung nung military amendaka aliba tesemtem amaktsü atema parnok indang prangbong injang aser hadir balala amshitsü atema Ukraine nem temelaba agütsütsü akok ta shiogo.

Ukraine tir Volodymyr Zelenskyy-i, Russia litsü nung tesem balala amaktsü atema mapang talangka nungi longer-range missile tem amshitsü atema parnok nem temelaba agüjang ta mepeshia arudar.

Kharkiv nung local ketdangsurtemi ashiba agi, yimti nung nisung aliba apartment block ka missile agi kongshiba sülen nisung asem süogo aser nisung 16 yiruogo.

Taoba hopta-a, Russia-i iba yimti kübok hardware superstore ka amakba sülen nisung 19 tepsetogo, ta ketdangsurtemi metetdaksü.



China tir aser Premier Li Qiang nati jaokba sülen Pakistan Ato Kilonser Shehbaz Sharif-i, June 4 nungi 8 tashi China semdangtsü, ta Pakistan Foreign Ministry-i metetdaksüogo. Pakistan PM Shehbaz Sharif-i China semdangba mapang China tir aser tanga ketdangsurtem den senden amentsü.

Nagaland Wrestling Association ketdangpurtem melentepogo



NWA ketdangsüba mapa toktsür aser tasen shimokertem NOA Office nung tangokba noksa yangi angur.

Kohima, Aami/June 1 (TYO): Tir Vivolie Kezo lenisüba nung Nagaland Wrestling Association (NWA) team tasenbai 2024-2028 tenure atema office mapa agizükogo.

Tanü Nagaland Olympic Association (NOA) office, PR Hill, Kohima nung menden melentepba sentong agiba mapang office toktsüba team-i team tasenba nem mapa belenzükja liasü.

Joint Secretary tasenba Kuzhovesa Soho-i sangdong ka ajanga ashiba agi, tir tejenba Dr. Hiabe Zeliang-i, team tasenba lenisüba kübok iba lokti tentet takok ma nung aotsü imlaja ataba lemsatepa liasü.

Tir tasenba Vivolie Kezo-i, küm pezü tashi Wrestling office mapa abentsü atema team tasenba dak temulung lemteta

shimba atema Nagaland nung aliba nüburtem dang kanga pelaba lemsatepba den, Assocation indang nükjidong aser tejangrabatem tejakdangi bener arotsü asoshi wadang ajak nungi nüburtem dang parnok den teka amteper inyaksü ayongzükja liasü.


Taoba NWA Advisor Neivikuolie Khatsü-i o tatsüka jembiba mapang, state nungi wrestler 8 den Officiating Referee 2 aser official 2 BRICS game nung shilem agitsü renema lir, koba iba ita tatemlen Russia nung asayatsü ta metetdaksü, aser Wrestling fraternity tem dang parnok nongita yaritsü aser teka amteper inyaksü mepeshia liasü.

Iba sentong ya mapa toktsüba General Secretary

Vilikho Bio lenisüba nung agi aser pai, office mapa belenzükja agütsütsü atema mapang talangka menoba atema sasa bilemba lemsatepa liasü.

Team tasenba nung, President- Vivolie Kezo, Vice Presidents- Viketouzo Meyase and Mitwatei Hebwang, General Secretary- Kenlum Hemang, Joint Secretary- Kuzhovesa Soho, Treasurer- Keneilel Rote, Technical Secretary- Vekhriyi Chüzho, Property Secretary- Rangsilang, Publicity & Information Secretary- Er. Seyielhouvi Nagi, Women Coordinators, Icedaile Haikube, Vesavolu Rhakho aser Mezhesino Keyho, Advisors- Dr. Hiabe Zeliang, Er. Lhuobeizo Kesiyie aser Vekhozo Ringa nung densema lir.

Uruguay nunger asayar Cavani international football asaya nungi anener



Edinson Cavani

Aami/June 1, 2024 (Agencies): Uruguay nunger nungtugu football asaya Edinson Cavani-i arishi küm 37buba nung pa international football asaya nungi anentsü telemtetba agiba sangdongogo.

Cavani shiba dang "El Matador," ta ajar pa ya Uruguay football puti otsü nung kanga dang tongtibang asayar ka lir, shiba linük tenüng nungi goal timtiba idaktsüba asayartem

rongnung tanabuba aser linük tenüng nungi timbaben asayaba asayartem rongnung tasembuba lir.

Uruguayan national team nungi asaya 136 nung asayaba mapang Cavani-i goal 58 idakja liasü.

Pai linük tenüng nungi 2010, 2014, 2018, 2022 küm FIFA World Cup nung asayaogo aser 2010 küm mezüngbuba asayaba mapang par team semifinal

tonga asaya aser asayamung nung pa ajak dang tajungtiba asayar ka ama ajaki agizükja liasü.

Linük team nungi asayaba mapang Cavani asoshi takok tulutibaji 2011 küm Argentina nung Copa América akokba ya asütsü, kong pai kanga tongibang shilem agia liasü.

Pa asaya nungi anenba indang social media ajanga lemsatepba mapang Cavani-i, linük tenüng nungi asayatsü atema maangka agütsüba atema kanga pelaba lemsatep. "Alima nung temeimtiba kü linük tenüng nung asayatsü atema maangka aguba kanga pelar," ta pai ashi.

Paisa, team teti masetshi-i nongita pusemtsü ta ashi. "tanü ni asaya nungi anentsü telemtetba agiogo, ajisüaka ni iba tebor tajung tola semer asayaba mapang ama dang kü mulung ajaki agi nenok sülen anidaktsü," ta pai ashi.

Mannei Cavani, Europe nung nungtugu club aika nungi asayaogo, kong Napoli, Paris Saint-Germain, aser Manchester United densema lir. Pa tang Argentine powerhouse Boca Juniors nungi asayadar.

Paris Olympics atema Nishant Dev ticket nguogo

Bangkok, Monupii/May 31 (Agencies): Hokolbarnü Nishant Dev (71kg)-i Boxing Olympic qualifiers indang semifinal tongtetba yong India nunger tebur boxing asayar mezüngbuba Paris Games quota angur kumogo.

World championships nung bronze medal angusang Nishant Dev ya taoba qualifiers nung tera agi Olympic berth mongutet, saka quarterfinal nung Moldova nunger Vasile Cebotari madak 5-0 agi takok ngua Paris Olympics quota ajantet.

India tsür Nikhat Zareen (50kg), Preet Pawar (54kg) aser Lovlina Borgohain (75kg) nungerbo Paris nung iba asayamung nung shilem agitsü jenjang ajanteta lir aser Nishant ya India nunger pezübuba alitsü.

71kg weight class nungya quotas pongu lir.

Dev ya iba asayamung nung kanga junga asaya arur aser Cebotari den tsüngtepba mapang pai amajok nung teka mesangshi saka mezüngmezünga ishiben kanga junga atsüng.

Round tanabuba nung Cebotari-i Dev dak ishiben tsüngshi aser pa tera ajema akümer ama liasü, saka pai maneni mezüngmezünga atsüng.

Tatembang minute asem nung tenaprong kanga sashia tsüngtep saka Dev-i tajungba tsüngshia liasü.

India tsür Anushita Boro-ia 60kg category quarterfinals nung Sweden tsür Agnes Alexiussen den kanga meranga tsüngtep, saka 2-3 agi tamakok ajurua liasü.

Manu-i Taiwan Open javelin throw asaya nung gold medal angu



DP Manu

Aami/June 1, 2024 (Agencies): India nunger asayar DP Manu-i Honibarnü Taiwan Open 2024 nung tebur javelin throw asaya nung gold medal nguogo. Pai nület meter 81.58 tsüteta gold ngua liasü.

Asian Athletics Championship nung silver medal ngur alisang yagi nület tatembangbuba atsüba mapang meter 81.58 ya tsüteta liasü. Taiwan Open ya World Athletics Continental Tour Bronze-level meet ka lir aser asayamung nung takok angurtem nem kanga tongtibang ranking points agütsür.

Honibarnü manu-i mezüngbuba nület atsüba mapang 78.32m atsü aser tanabuba nung 76.80m tsüa liasü.

Ajisüaka arishi küm 24 taina sayar yagi round ka nungi ka ta tajungba tsüteta atu aser

tasembuba aser pongubenbuba atsüba mapang 80.59m aser 81.52m tsüteta liasü. Pai nület pezübenbuba atsüba mapang foul mena saka kanga tashi ita asayamung tembangtetogo.

Ajisüaka Manu-i taoba mapang 84.35m tashi nület tsüteta tajungba asayar lir. Pai taküma taoba ita Bhubaneswar nung Federation Cup asayaba mapang nület 82.06m tsüteta lir. Iba asayamung nung pa Olympic champion Neeraj Chopra sülen tanabuba jenjang nung tembanga liasü.

Manu shiba taoba küm World Championships nung trokbuba nung tembanga liasü, pa taküm Paris Olympics atema qualify mesüi lir, kechiyong qualification mark ya 85.50m lir.

India nunger asayartem rongnung Chopra aser Kishore Jena nabo taküm Olympics atema qualify süogo.

BILEMDANGANG

"Anema alidang, timtem tekangshi nung alidang, tia tensa ajak nung teyanglur bilemtetang."